

ЛҰИМА СЭРИПОС

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

22 июня
2017 года
№12
(1150)

Основана 11 февраля 1989 года



С.Ромбандеева вәрум хури

Ты хуриг хонгаң маңыңи бйга Анатолий Николаевич Хомяков
ос округ кўшай нб Наталья Комарова пбслым блбг. Россия яныглан
хбтал касгыл ёмщакв рўпитан маҳум яныглавёсыг.
Ты урыл 2 лбпсыг ловиньтән.

Ты
номерт
ЛОВИНЬТӘН:

Ёмщакв
рўпитан маҳум
яныглавёсыг

2

Мир янытыл
щань
латңыт
уральтавет

4

Сыстам
Нёрь янув
вәтат
сõрни
ловтаве

8-9

Мирн вәнэ
маңыңи
поэтув
стиханэ

14-15

Ялпың
хбталт
товлыңхәпыт
яласасыг

16

ЛҲХХАЛЫТ

Ёмщакв рўпитан маҳум янытлавёсыт

Лўпта этпос 9 хōталēt округ мирколт мāv янытыл Ёлнэ кārкам маҳум, ёмщакв рўпитан нэкет ос хум хōтпат Наталья Комарова, кўщажун, янытлавёсыт, Российский Федерация ос Ханты-Мансийский округ пāлыл яныг намытыл майвёсыт.

Наталья Комарова тох лāвыс: «Россияв — ты āти туп нас ёлнэ мā. Мā янытыл ёлнэ сāv хōтпа мāгыс тав сымын рōвнэ ятил мā, ятил кол. Тыт ёлуңкве мāн кāсашёв, мātёв эруптылўв, янытлылўв. Россиявт сāvсыр мирыт пуссын аквёет юртыңыщ ёлэгыт, рўпитэгыт, халанылт нётхатэгыт. Ты мāt пёс йис тāгыл мāн мāхманув ёлсыт, тāн хольтаныл ань мāv ўргалаңкве эри. Югра мātёв тай Россияв мāгыс сака яныг пāрыс тоты. Тав щар мāk котилът ёлы, таимāгыс мōт областитн манос районытын тав акваг матыр нётмил вāрапаңкве вёрми. Округт ёлнэ ятил тының мāхум, Юграв мāгыс нāн сāv ёмас тёла вāрегын, сāv рўпитэгын. Матёмас нāн пуссын тамле кārкамыт, апрыңыт, нāн ляпант ёлуңкве сака ёмас, нāнаныл матыр эрнэ тёла ханищтаңкве рōви. Нāнанны Россия ялпың хōталыл янытлыяну, пуссын пустагыл ёлэн!»

Тынакт 19 хōтпа государствос округ пāлыл янытлан нэпакытыл майвёсыт. Тāн халанылт сāv нйврамың нэ — Татьяна Ковина, тав «Материнская слава» мāглын тагатан пōсыл майвес. Татьяна Чарикова ос Людмила Рябинина «Заслуженный деятель культуры Югры» намыл майвёсыт.

Александр Бабушкин — «Ханты-Мансийский клинический кожно-венерологический диспансер» пўльницат яныг лёккар вāңын хум ос Сергей Мазурин — Октябрьский пāвил пўльницат яныг лёккарыг рўпитан хум «Заслуженный работник здравоохранения Югры» намыл майвёсыт.

«Лесная сказка» нйврам ўргалан колт кўщажун рўпитан нэ Ольга Гребенникова «Заслуженный работник образования Югры» намыл майвес.

Ты мāхум сāv тāl сака ёмщакв рўпитанёныл мāгыс ос Ханты-Мансийский округ губернатор Почётный грамота нэпакыл майвёсыт: «Самотлорнефтегаз» мāt инженерыг рўпитан хум Сакар Атакишев, округ янытыл ёлнэ Территориальный управление Федеральный агентстват государственной формасыт палт пуңтотнэ хум Владимир Белов, «Государственный архив» колт эрнэ нэпакыт ёт рўпитан нэ Лидия Завьялова, спорт тёла мāt инструктор-методистыг ёлнэ нэ Ирина Красникова ос ўлщпуңк пусмалтан лёккар Сергей Могильников.

Малый Атлым пāвилт ОАО «Югорская территориальная энергетическая компания —



Сāv нйврамың нэ
Т. Ковина янытлаве

Кода» мāt мастерыг рўпитан хум Борис Мельничук «Заслуженный энергетик Югры» намыл майвес.

Ты хōтпат округ кўщажун Благодарность нэпакыл майвёсыт: Александр Дулин — «Детская школа искусств» колт нйврамыт ханищтым рўпиты, Мурат Катаев — «РН-Юганскнефтегаз» мāvой нōх-винэ мāt кўщажун вāңын хумыг ёлы, Ирина Петухова — Нягань ўст «Планета» нампa культурный центрыт мāхум балет тэлан ханищтыянэ, Галина Танчук — Приобье пāвил школат физкультура учителяг рўпиты ос Александр Черемисин — Ханты-Мансийск ўст «Городские электрические сети» колт электромонтажный ос наладочный рўпата участокт кўщажун ёлы.

Татьяна Беспалова, «Кондинские озёра» природный паркыт кўщажун вāңын нэ, «Заслуженный эколог Российской Федерации» намыл майвес.

Ты мāхум халт акв мāныщи хум яныглавес — Анатолий Николаевич Хомяков, Россия Президентын Почётный грамота нэпакыл кётвес. Тав Кондинский район Половинка пāвилт ёлы, тот хōнтаң мāныщит музей ўнттыс. Ты хōтпа мощёртын онтырсāt тālэ ты ляпами, ос тав иң яныгпāлаг ат сусхаты, ань ты хōтал мус сāv рўпиты, хōт-āти яласы. Тавён ос ань ты лāвылтам хōтпатн сāv ёмас лāтың кётэв, пуссын пустагыл вос ёлэгыт!

Светлана МАТВЕЕВА



А.Н. Хомяков пыге ос аңге ёт ўнлэгыт

КЎЩАИТ РЎПАТАНЫЛ

Ищхйпың утыт ёт ълнэ тэлат тара-паттувёсыт

**Ханты-Мансийск ўст мирхал
Хонтоловит IT-Форум вэрыглавес.**
Тыи ищхйпың утыл пўмшалахтын ос тән ётаныл рўпитан нак тох лававе. Тыг мот хон манытыл сав махум ёхталасыт, тыт акван-хонтхатыглам мананыл БРИКС ос ШОС намыл лававет.

Форумн Уральский федеральный округт кўщаиг ълнэ хум Игорь Холманских, связь ос ищхйпың утыт ёт рўпитан министр РФ хум Николай Никифоров, Россия президентув палт советникыг ълнэ ос тот ищхйпың вэрмалит тара-паттын хум Герман Клименко ёхталасыт. Тән ётаныл ос пуссын мўй махум ёт округ губернаторув Наталья Комарова пащалахтас ос аквёт ёмшакв элал рўпитан латың лавыс. Акв тамле паща латың Российский Федерацият мот хоньт вэрмаланыл тара-паттын министрхум Сергей Лавров кётыс. Ос та юи-палт Мадагаскар, Китай, Индия,

ЮАР мот хон маныл ёхталам кўщаит ос ЮНЕСКО колт пуңктотнэ хум докланданыл ловиньтасыт.

Ты форумын кит сётыра атсат арыгкем элумхёлас акван-атхатыгласыт, тән 46 савсыр мот хон маныл ос 44 российский савсыр регионьтныл ълсыт. Кит хоталыг сыс тән магсыланыл ватахкем савит сыре-сыр мероприятият вэрыглавёсыт ос тот танки халанылт акван-нётхатым, аквёт рўпитым сатхуйплов соглашение-нэпакыт хассыт. Индияныл ёхталам делегация мән округув ёт кит меморандум-нэпакыг хассыг. Тыи Югорский ищхйпың вэрмалит тара-

паттын ос технологият хаништан институт ёт наука щирыл акван-нётхатым тах рўпитэгыт, ос агмың махум пусмалтан магыс ищхйпың ут хосыт хаништан вэрмалит суссылтанкве патэгыт.

Тувыл ищхйпың тотапсовн акван-атым эрнэ нэпакыт, олныт акв мән хансым нэпакыт нэмхотталы иллтыг ул вос тыпсыт, хаштэл хотпатын ул вос тўлмантавёсыт, ты вэрмалит ѡвылтыт сав номсысыт ос потыртасыт. Ывлёт ты касың странан йильпи ищхйпың тотапсовыт танкинанылн вэруңкве эри ос тувыл танки магсыланыл ўргалахтын йильпи программат вос щёпитэгыт. Хунь тән та щирыл вэрёгыт, тонт тэланьл нөх-вормалтыяныл тах. Ос аны ты пормасыт ёвтнэ магыс тән мот хоның щёлың матын кредит винэ олныл саралавет, ѡвлёт

ул кос мощ нётавет, ётыл тот сав арнтаңыг ёмтэгыт.

Ань пуссын ты вэрмалит «Инфофорум — Югра» конференцият тарапаттувёсыт, тувыл мўй махум магыс «Информационные технологии для всех» нампасуссылтап вэрыглавес. Тот махум пусмалтан, ма-вёй ос газ нөх-винэ ищхйпың утыт, хаништапыт, ЖКХ рўпатат элумхёласн нётнэ утыт суссылтавёсыт. Ань матырсыр эрнэ йильпи пормасыт аквтох элал вэруңкве рёвёгыт, кәсашегыт ке, акван-нётхатым рўпитаңкве вёрмёгыт. Онтоловит щёс вэрыглым форуманыл сака пўмшиг ѡлыс, мўй махум аны сав тэлат вәнэг ѡныцияныл. Мот хон маныл ёхталам хотпат округт ѡлнэ кўщаитн яныг пўмашипа латың лавсыт.

Тамара ХАТАНЕВА

Мав махум магыс аквёт номсахтэгыт

Наталья Комарова, Игорь Холманских, Николай Никифоров, Герман Клименко
ляххал тотнэ хотпат ёт хонтхатыгласыт ос това тэлат тара-паттысыт.

Форумн акван-атхатыглам махум аны йильпи ищхйпың пормасыт танки вэруңкве таңхёгыт, мот хон маныл тамле утыт сака ул вос ёвтавет. Ты ѡвылтыт Игорь Холманских тох лавыс: «Касың мирколт ищхйпың тотапсовн хансым эрнэ нэпаканыл мот мат вәңкве ул вос патвёсыт, мән государств тэланэ ўргалан магыс манки мавт вэрнэ утанувтыл пентьянў тах».

Николай Никифоров элал потыртас: «Россият 3 сётыра 300 сыре-сыр ищхйпың программат щёпитавёсыт, товат аны ёмшакв рўпитэгыт. Ывлёт 10-20% мирколытт рўпитан хотпат танки магсыланыл Россият вэрнэ программат ёвтсыт, аны 40-50% мирколыт программаныл ѡс пентсаныл».

Герман Клименко лавме щирыл, тән государств тэланэ ўргалан магыс

хосат тагыл туп мән мавт вэрим утыты рўпитэгыт. Тән яныг хонтлан магыс техниканыл ос космосн тыламлалнэ тэлат ўргалым ѡныцияныл.

Тувыл Наталья Комарова лавыс, округувт ма-вёй ос газ нөх-винэ промышленностит, махум пусмалтан магыс манки палтув вэрим ищхйпың тотапсовытын пуссын пентуңкве ѡс эрёгыт.

Мот хон маныл ёхталам сав мўй махум таи хўлтэгыт, мән Юграв ищхйпың утыт хосытыл сака элал патум. Аны БРИКС — тыи Бразилия, Россия, Индия, Китай,

ЮАР остувыл ШОС — тыи Россия, Китай, Казахстан, Киргизия, Таджикистан, Узбекистан мат акванхасхатым танки халанылт нётхатэгыт. Мотлынув тән палтаныл Индия ос Пакистан тув хасхатасыг. Мот хон маныл ёхталам хотпатын ты рўпатав нас сунсым аны уральтавес, тыи Афганистан, Белоруссия, Иран ос Монголия. Тувыл тэланув ёмшакв вэрнэв щирыл Азербайджан, Армения, Камбоджа, Непал, Турция ос Шри-Ланка мот хотманыл ёхталам махум ёт кўщянув ѡс потыртасыт.

Тамара МЕРОВА

Мир янытыл щань латңыт уральтавет



Кос хоты страна ань сунсуңкве ке, тот савсыр мирыт олэгыт ос танки хурип латын оныщэгыт. Тан ЮНЕСКО ос ООН мирн нётнэ организацият рүпитан хөтпатн латңаныл уральтавет ос касыңэмт сарсыр тэлат тарапаттэгыт. Ты вәрмалит уральтан хөтпат экспертыг лававет.

Ты накт Ханты-Мансийскат 35 савсыр мөт хон маныл тамле экспертыт акван-хонтхатыглалсыт ос мирыт халт латңанув хумус элаль олэгыт манос молях сөймэгыт, ты овылтыт хоса потыртасыт.

РФ ЮНЕСКО тармыл «Информация для

всех» программа щирыл Евгений Кузьмин рүпиты. Тав лавнэтэ щирыл, ань ма янытыл сат сөтыра танки щань латын ошнэ савсыр мирыт олэгыт. Ань тытыл 50% сака мощцаг хультум мирыт мощертын щань латңаныл ты сөймэгыт. Тыи,

соль, мир янытыл олнэ махум акв ман кит латңыл потыртаңкве ханищтавет ке, тонт савыңпалэ мөт латңыт хот та ёрувлавет. Хус тал ювле хультум сыс мир янытыл руш латын ванэ ос ханищтан махум ос мощщамас. Ань сав мир английский латңыл потыртаңкве ханищтавет.

Тох ул вос ёмтыс, ЮНЕСКО ос ООН тармыл рүпитан экспертыт сав номсахтэгыт ос тан тэланыл элаль тотнэ магыс округ правительствав ос нёты.

Ханты, маньши, ёрн латңытыл элаль потыртан магыс савсыр программат хансым олэгыт, ты овылтыт Алексей Шипилов, губернатор ваңын хум, потыртас. Маньши нэг Майя Макарова соссаң ныврамыт латын ханищтан тэлат урыл потыртас ос Наталья Анадеева Саша пыгёнтыл муй махмыт магыс «Ат латын» проектаныл суссылтасыг. Тот Марсель Дики-Кидри Африка латын академият профессорыг олнэ хум тэн пөхатэт люлим ханищтахтас, мөтаныт танки ўнлын манылт ос ханищтахтасыт.

Ань ищхипың утыт хосыт ма янытыл олнэ латңыт хумус элаль тотуңкве рови, ты урыл ос потыртасыт. Тувыл сав маныл учёныит танки докладаныл ловиньтасаныл, товат ханищтан программат, нэпакыт тыг тотсыт ос таияныл суссылтасаныл.

**Тамара
МЕРОВА**

Соссаң махум акв нэпакн хансавет

Округувт олнэ соссаң махум урыл потыртаңкве кұщаянув ос та акванатхатыгласыт. Губеранторув овыл ваңын хум Алексей Шипилов, внутренний политика департамент, рүпата ос занятость департамент, ўнттын колыт уральтан департамент кұщайт ос мөтаныт ты сапрәнин ёхталасыт.

Хантыт, маньшит ос ёрныт юи-овыл талыт манарыл ос хумус нэтавет, та урыл департамент кұщайт потыртасыт. Государственный Думаныл округувн пищама ёхтыс, това мань павылт олнэ соссаң махум танты магысла-

ныл матыр нётмилн атум нэпаканыл ат пирмайтавет.

Тох Советский районт Тимкапавыл нэмхотталы хансым ат олы, таимагыс та махум Таёжный павыл нупыл вос хансавет. Тащирыл тананылн ёрнэ нэпакыт

атуңкве кұстырнув паты. Ань кұщайт ос касың мирколытын пищмат тетэгыт, тот ос вос ты нэпак ёт миркол кұщайт рүпитэгыт.

Округ миркол кұщайт хосат тагыл «реестр коренных народов» урыл потыртэгыт, ос хунь тан астыляныл, ты вәрмалы урыл Сергей Тимошков, внутренний политика департаментыт кұщай ваңын хум, лавыс: «Ты реестырн хаснэ хөтпат национальностяныл коныпал эри ваңкве,

хөт тан олэгыт, хотьют мань павылт манос вөрт олы, тан хул алыщдым, вөраим олэгыт манос мөт хотты мат рүпитэгыт. Пуссын ты вәрмалит ваңкве хунь патэв, тонт мирколытт рүпитан махмытын хантытын, маньшитын ос ёрнытын нётмил вәруңкве кұстырнув паты». Алексей Викторович кұщайтын лавыс, ты вәрмалы ёт моляхнув вос рүпитэгыт ос таквсы порат вос астыляныл.

Галина КОНДИНА

Лёккарыт ос лылыяныл нэглум хөтпат

Ханты-Мансийск үст мак яныг пүльницат «Руки добра» нампа хөнтхатыглап вэрыглавес, тув лёккарыт ос пусмалтахтам, лылыяныл нэглум хөтпат ёхталасыт. Ты тэла лёккарыт ялпың хөталаныл ос келп минэ махум (тән руц щирыл «Донор крови» лававет) янытлан мирхал хөтал кастыл вэрыглавес.

Округ кұщай нэ Наталья Комарова тув ос вовиньтэлавес, тав тох лавыс: «Мән тамле ялпың хөталыт порат — лёккарыт ос келп минэ махум янытлан хөталт акваг хөнтхатыглэв. Агмың хөтпа пусмалтахтункве таңхи те, лёккар рұпататэ тонт ущ ёмас щирыл мины. Тав лёккар латңен хунтлы те, юн ос махманэн үргалаве, нётаве те, тонт вайм лёккар тав магсылэ ущпылнэг сав эрнэ тэла вэри, мұсхал щирыл пусмалтаве».

Иван Чемеркин агмың хөтпат магыс келп минэ элумхолас кинсы. Келп манрыг эри, тав ты урыл махум ёт потрами, пүльницан вөвиянэ. Мән мавт тав хосытэ 30 арыг эрнэ тэлат вэрыглавесыт — «Спасибо, доктор!», «Авто-МотоДонор», «С Новым годом, Служба крови!» ос мот тамле тэлат. Ты тал келп минэ махум халт «Лучший донор России» нампа касыл олыс, Иван «Ре-

гиональный лидер донорского движения» номинацият нөх-патыс. Лёккарыт нупыл тав тох лавыс: «Мән акваг нән ляпант олэв, матыр нётмил эрмыглы те, лавен. Келп миңкве мән нән палтын акваг щёс ёхтыгпёв».

Округ кұщай нэ Иван Чемеркин ос лёккарыт янытласанэ, тувыл латың лавыс: «Ювле хуль-тум тал ват сграпнал этпосэт округувт сака пылщмаң нак олыс — ань нэврамаквет машинал миныманыл, тән палтаныл мот маши-на пелхатас, тованыл сака сакватавёсыт, тот тара атимыг ёмтсыт, тованыл ос лёккарытын ань тыхөтал мус пусмалтавет. Та порат округув янытыл олнэ пүльницатын келп миңкве сака сав мир ёхталас. Туп аква Ханты-Мансийск үст атсат арыг хөтпа келп мисыт. Келп группанэ халт мощцаг олнэ ос шар мак эрнэ группа келп Сургутныл тотыглавес. Ты сымың



**Лёккарыт
янытлавёсыт**

махум, ёр махум хосыт сакватахтам нэврамыт лылыяныл та нэглысыт. Ятил, тының лёккарыт ос келп минэ махум, нән мән янытлыянүв, сав ёмас латңыл лавиянүв. Мән, округт олнэ мир ос пусмалтахтам махум, касың лёккар элы-палт ма мус хұтахлэв».

Ты хөнтхатыглапын ёхталам мир халт сөтың хөтпат олсыт, тән лёккарытын сав ёмас сымың латың лавсыт. Ирина Щербакова китыт нэврамыңыг 18 тал сыс ёмтуңкве ат вёрмыс. Тувыл ань ЭКО нампа йильпи тэла хосыт ты пүльницат тав мөлты тал китыт пыге самын патыс. Ирина лёккарытын пумащипа латың лавыс, ты нэвраме тав сака сав тал ўрыстэ.

Мот нэ наме Маликат Магомедова, тав колёсаң уласыл тыгле-тувле яласы, ёмыгтаңкве такви ат вёрми. Округ пүльницат рұпитан лёккарытн нэ нётвес, пусмалтавес, тувыл тав нэврам самын паттуңкве вёрмыс.

Тамле ёмас потрыт та хунтамласүв. Тот «Спасибо, доктор!» нампа пөслын тэла вэрыглавес, нэврамыт катыл маттем та пөслысыт, тувыл хурияныл лёккарытын мүйлуптасаныл.

Ты юи-палт лёккарыт пуссын КТЦ «Югра-Классик» эргын-ййквнэ колн вөвиньтэлавёсыт. Округ кұщай нэ Наталья Комарова, округ Думат пунктотнэ хум Борис Хохряков ос мир пусмалтан департамент колт кұщай Алексей Добровольский тананылн сав ёмас сымың латың лавсыт. Төва лёккарытн государственныл ос окружной грамота нэпак мисыт, төват ос магыл пөсыл тагатавёсыт. Пусмалтахтам махумн лёккарыт ос маттем та янытлавёсыт, сав ёмас латңыл, пумащипа латңыл лаввёсыт.

Наталья Комарова самвит сэгумтэлым тох лавыс: «Төва лёккарыт, хөтпа пусмалтанэныл коныпал, тав ётэ сымыңыщ потрамёгыт, ёмас латңыл лавияныл, таве мұсхал щирыл уральтыяныл, пусмалтыяныл. Тамле лёккарыт тох лававет — «Врачи от Бога». Ятил тының лёккаратёнув, нән вэрнэ ёмас тэлаанын, мән палтув ёхталам рёгын, пуссын нанти палтын ювле вос минёгыт. Пустэгыл олэн, сөтыңыщ, щуниңыщ олэн!»

Светлана МАТВЕЕВА



Ущтин Ваща урыл потыр

Хальүс район Саранпавылт Ольга Владимировна Лелятова ӧлы. Тав тот садикт рүпиты мәнй нйврамыт мәнйши ләтңыл потыртаңкве ханищтыянэ. Мӧлал тав Ханты-Мансийск үсн ёхталас. Мён акван-хӧнтхатыгласмён, мощ потрамасмён. Тав ӧпатэ Василий Устинович Албин яныг хӧнтын тотыглавес. Ольга Владимировна тав ӧлупсатэ урыл ӧнумн мощ потыртас.



В.У. Албин

«Ам ӧпам Василий Устинович 1903 тәлт Лӧпмус павылт самын патыс. Ты мак тав аще ӧлум павыл. Омагэ такви ӧпарищ наме Вьюткина ӧлыс, тав Сүкыръя павылныл ӧлум нэ. Ӗпам сака ёмас хӧтпаг ӧлыс. Ам мәнй порат тав сака ёмшакв номилум. Тав сәңквылтапыл мәщтырыг сәңквылтас. Ӱй йикв тәныт пуссын сәңквылтасанэ. Мәнйши ләтңыл нётнэ турсуил эргыт эргыс.

Ягпыганэ халт тав котиль пыгыг ӧлыс. Ам кит ягпыгаге номиягум, щар яныг Корнил. Ӗпам мәнйтагыл хӧл

алыщлаңкве ос вӧраяңкве ханищтахтас. Вәтихал такви вӧраяңкве ялантәлыс, ят хӧл алыщлас. Ащён манарыл ханищтавес, таи пуссын вәрыс.

Тав махмытын Ущтин Ваща намыл ләвыгләлвес. Война ӧлыпәлт ӧпам нэ тотыс. Экватэнтыл хӧрум нйврам ӧщсыг. Щар яныг пыге ты ам ащум ӧлыс. Тувыл кит агииг Нина ос Аня ӧлсбг. Щащёк-вам потре щирыл, тән сартыннун иң кит пыг ӧщсыг. Ос та порат тәрвит ӧлупса ӧлыс, тән мәнй порат матырсыр ағмыл сас ағимыг ёмтсбг.

Тувыл пилыщмаң нак ёмтыс. Фашистыт мән мав нупыл хӧнтлым ёхтысыт. Ӗпам тӧнт хӧнтлын мән 1941 тәл оигпан порат вуйвес. Щащёк-вам таккёт хӧрум нйвраманэ ёт юн хультыс. Ӗлупсатэ сака тәрвитың ӧлыс. Ам ащум тӧнт хӧт тәлэ тӧвлыс. Тав ты омагэн нётыс, савсыр рүпата юн вәрыс. Ӗпамныл сака хоса пищма ат ёхталас. Тав лылың манос ағи, ты урыл нэ-матыр ат вәсыт.

Тувыл 1944 тәл оигпан порат ӧпам юв ёхтыс. Акв мāt хӧнтлыма-тэ вӧртыпал кәтэ нйлын сакватыма. Пүльницат пусмалтахтуме юи-

пәлт тав юв кётвес. Юв сав хӧтал йис. Щащёк-вам потыртәлыс, ӧпам хунь хӧнтлын мәныл юв ёхтыс, павлың махум пуссын хот-щәгтсыт. Тӧнт тав щащёк-вамн тох ләвыс, ам лылым таимәгыс нәглыс, Тӧрум ащумн, Нәй-Ӗтыранунмн үргалавёсум.

Бомбат нумыл хунь пәхвтувёсыт, мә шар пулиг-ӧхтыртавес, сав хӧтпа порславес. Тән акв руц хум ёт вӧнхан түйтхатым хуясыг. Ӗпам руц ләтңыл люльсаң потыртас, акв хумитэ нупыл ләвыс, минымён мӧт вӧнхан молях түйтыгпахтымён. Та ӧйка ләвыс: «Маныр наскәсыг, тыт хуимён, үрхатымён, мощёртын курыгтан нак пӧйты». Ӗпам

хӧл алыщлаңкве ӧвылтахтас. Тувыл Саранпавыл нупыл ӧлнэ сәлыңколытын рүпитәңкве минас. Тот пиркатирыг пенсиян патме мус акваг рүпитас».

Хӧнтлын нак юипәлт экваг-ӧйкаг иң ат нйврамён самын патсыт. Тән нёлолов нйврам янмалтасыг: ат пыг, хӧрум ағи. Устин Ваща пенсиян патыс, Лӧпмус пәвлән юв ёхтыс. Та порат сав хум хӧтпат войнаныл юв ат ёхтысыт, сав экват тәнкёныл нйврамың тагыл хультсыт. Мәнйши хум вӧраяс, хӧл алыщлас, павлың махумн нётыс, тән ётаныл пувум хӧлыл, кәтын-паттум нёвлит уртхатас.

Ты коньпал Ущтин Ваща нййт хӧтпаг ӧлыс.



Ты хурит О.В. Лелятова касуңкве ялум мāt мәнйши нёт ёт пӧслувес, тав нуйсахил ӧлы

илттыг мӧт вӧнхан порыгмас. Та мāt хӧт тән аквёт хуясыг, тот бомба куратас, та ӧйка порславес. Мәнйши хумув ос лылыңыг хультыс. Аквтупмат хотьютын хӧлтвес.

Ӗпам юв ёхтыс, тәра щёмьятән нётуңкве патыс, вӧраяңкве ос

Махум матыр ағмыл ёмтәгыт, тав пәлтэ пусмалтахтуңкве ёхталасыт. Тыи ос мӧт сав ёмас вәрмәль мәгыс павлың мирн тав сәка эруптавес ос янытлавес. Тамле ты ёмас мәнйши хӧтпаке ӧлыс.

Николай МЕРОВ

МӐ-ВИТ ӲРГАЛАН ВӐРМАЛЬ

«Сӓрни лӓлы» тыг йсыс

Мӓ-вит ӳргалан кастыл Ханты-Мансийскат XXI мирхал телефестиваль ӓлыс. Ты вӓрмаль «Югория» намп телекомпания вӓрыглы. Тот кина пӓслуҥке хӓснӓ хӓтпат манос нас тӓнки хаништахтам мӓхум халанылт кассыт. Тынакт нӓх-патум хӓтпат наманыл лӓввӓсыт, тӓн ӓсгын нӓпакыл ос «лӓлы» - товлыҥ ӱй хурил мӓйлуптавӓсыт.

Ты ӓлы-пӓл хӓталыт телефестивальн ӓхталам хӓтпат художественный галерея-колн мӓйлунҥке вӓвыглавӓсыт. Тот тӓн ӓтаныл округ губернатор Наталья Комарова ос округ Дума кӓщай Борис Хохряков пащалахтасыҥ. «Ты телефестиваль вӓт ну-пыл акв тӓл вӓрыглаве, ӓлумхӓлас тасӓвит тӓвлум тӓланӓт осыҥсайтыҥыг ловиньтахты, тав тӓланӓ мӓгыс сӓккӓныт щирыл такви мӓк вос номсахты. Ань телефестиваль вӓрнӓ хӓтпат аквта холыт ӓлал тӓланыл мӓсхалыг вос вӓрияныл, сӓв мирыт ӓт вос румалахтӓгыт ос пуссын акван-вуйхатым мӓкӓв сыстамыг вос ӓныщияныл», — кӓщай нӓ лӓвыс. Тувыл мӓт мӓйл хӓтпат лӓтыҥ лӓвманыл юи-пӓлт пуссын кон-квӓлсыт, тот оркестр ӓнгыс ос та кол пӓхат ущ вӓрим «Сӓр-

ни лӓлы» — товлыҥ ӱй памятник суссылтавӓс.

Тыт ӓлнӓ хӓталыт сыс сӓв мӓныл ӓхталам хӓтпат мӓгыс мӓ-вит ӳргалан ӓвылтыт хаништапыт, суссылтапыт вӓрыглавӓсыт, сӓвсыр кинат суссылтавӓсыт. Ты тӓл телефестиваль касылын сака сӓв мӓныл онтоловсӓт сӓвиткем кинат кӓтвӓсыт, жури-хӓтпатын тӓнаныл пуссын сунсуҥке ӓлымаҥке ӓрыс. Ос юи-ӓвылт кӓсыҥ номинацият нӓх-патум хӓтпат наманыл та лӓввӓсыт. Тӓнаныл янытлаҥке мирн вӓнӓ хӓтпат тыг вӓвиньтӓлвӓсыт ос тӓн мӓйлупсат мисыт.

Нӓврам касылыт тӓн тӓланыл щирыл хӓрум группаг уртвӓссыт, тувыл 6 тӓлныл 10 тӓл тӓвлум ӓгиришит-пыгыришит халт Нягань ӓсныл Александр Дедык



Зольтан Тӓрӓк лӓлы мӓйлуптавӓс

ос Анастасия Горбунова нӓх-патсыҥ; 10 тӓлныл 14 тӓл тӓвлум нӓврамыт халт — Лысва ӓсныл Пермский ӓрныл Артӓм Палкин ос 18 тӓланыл тӓвлум ӓгит-пыгыт халт Челябинск ӓсныл Анжела Яньшина ос Ксения Наумова. Ту-выл «За оригинальный взгляд на проблемы экологии» намаим янас мӓйлупсал Мегион ӓст ӓлнӓ ӓги Елена Степанова майвес. Тӓнаныл пуссын янытлан ӓлыпӓлт акв пӓмыш мультфильм суссылтавӓс, таве тыт «Эко-детки» намп хаништап ӓлум порат вӓрвӓс. ӓгиришит-пыгыришит пластилиныл сӓвсыр хурит ханлысыт ос тувыл мӓ-вит ӳргалан ӓвылтыт мультфильм пӓслысыт.

Мӓт мӓхум халт лов номинацият нӓх-патум хӓтпат наманыл лӓввӓсыт. Ты тӓл «лӓлы» мӓйлупса Абакан ӓсн, Москван, Липецк, Новосибирск, Псков, Смоленск, Тюмень ӓсн ос Свердловский областын тотвӓсыт. Акв лӓлы хури тыт Ханты-

Мансийскат «Югра» телекомпаният рӓпитан ӓгин Пшеничная Мариян мӓйлуптавӓс. Тав «Публицистическая программа» номинацият «Передвижные дельфинарии — это доброе шоу или социальное зло» мӓнь кинатӓ мӓгыс майвес. Ты тӓл акв йильпи номинация вӓрвӓс, заповедникыт ӓвыл щӓс вӓруҥке патым пӓсныл яныгсӓт тӓл тӓвлыс. Тыт ань Юрий Курочка Абакан ӓсныл ӓлум хум «Дикая природа Хакасии» кинатӓ мӓгыс ӓсгувӓс.

Ос шар яныг мӓйлупса, Гран-При, Швеция мӓн тотвӓс. Зольтан Тӓрӓк хум тыг китынтыг ӓхталас, тав ань «Лемминг — маленький гигант Севера» пӓслум кинатӓ мӓгыс янытлавӓс. «Сӓрни лӓлы» мӓйлупса тавӓн Геннадий Бухтин, губернатор вӓнын хум мӓйлуптас ос тувыл кӓщай мӓтынтыг мӓхум мӓйлунҥке ӓс тыг вӓвсанӓ.

Тамара МЕРОВА



Сыстам Нёр янув ватат сёрни ловтаве

Хосат тагыл Хальүс районт Нёранувт Хсавсыр тының ахвтасыт тинсавет. Тот экспедицият рүпитасыт, ань тамле предприятие мощаг кос ёмтсыт. Мёлал мән Татьяна Гоголевал, государственный дума депутатыл, Надежда Алексеева, думат рүпитан нэл ос округ недропользование департаментыт рүпитан кўшай ваңын хум Владимир Коркунов ёт Нёрытт сёрни ловтнэ махум палт вертолётыл ялсүв.

Ты «Техразведка Урала» нампа Екатеринбург ўсныл ёлнэ компания лицензия-нэпак 2020 тал мус ёв-тум. Кўшайг тот Сергей Мазур ёлы, тавён нё-тым Герман Анисимов рүпиты. Ты элы-пал тот хўрум ят — Яныг Тагт, Контия, Лумсу-ля акван-патнэ мат «Сосьвапромгеология» рүпитам. Тән улпыл матсавит сёрни хон-тыгласыт. Тән юи-пә-ланылт мот матхурип компания рүпитаңкве ёхталам, нэматыр хон-туңкве ат вёрмысыт, ма та осувласаныл.

Ань аквта мат рүпи-тан «Техразведка Ура-ла» кўшайаныл лави,

тән Китай маныл олн минэ хотпат хонтсыт, руш щирыл инвесторыг лававет, ты китайский компания танти вәр-нэ оборудованияныл тыг тотсаныл, танти махманыл пуссын ты шаңквыт акван-атуң-кве патэгыт. Ос элалъ хунь ты тёрсупаныл рүпитаңкве паты, ос китайцыт тармыл тах тот уральтыяныл. Мән ёхталамүв порат махум уш рүпитаңкве овыл-тахтамыт. Хусахтем ки-тайцыт рүпитэгыт ос това хотпат Ивдель-ныл, Няхщамвольныл рүпитаңкве вуйвёсыт.

Та мат, хумус экс-педиция юи-палт савсыр харңаиң пўш-



Г. Анисимов, С. Мазур,
В. Коркунов ос Т. Гоголева

кат, тёрсупыт хулытсыт, тот тох мори та хуиглэ-гыт. Хулытум колыт, балокыт тән мощ хот-щёпитамамыл, акв кол тэнут пайтнэ колыг, мотанытт ос ёлуңкв вәрманыл. Мот хон маныл тотым махум тэнут танти вәрёгыт. Ос матахмат балокытт янас танти ёлэгыт.

Мән тув вертолётыл ёхтысүв, ос ёлалъ хунь сунсёгын, я вататэ шар пулиг-ёхтыртым ёлы. Пёс порат рүпитам ма-хум хумус та ма ос-сувласаныл, тох сэй ос ахвтас тэлың яныг анят ўнлэгыт. Вит ватат ул-

пыл хуньт вөр яныгмас. Яныг тракторыл ос экс-каваторыл макве нон-халь ёнхтавес, тох та ос-сувлавес. Та пораныл ул хусахтем тэлыг ёмтыс.

Сергей Васильевич Слатёе щирыл, ань тән нэматыр химиял сёрни ат ловтэгыт. Сәр-тын тох вәрвес, ма виве, витыл ловтаве, рақтың витэ хот-сөсаве, сёрни саквыт паттат хулытэгыт. Ань матырмат пувыр ут оныщёгыт, та тивырн матсавит ма пинаве, пувыр ут молях ёнхи, сёрни саквыт пувыр ут онтсыл ханэгыт. Тох ты ма ос сёрни титтыг-



Сёрни ловтнэ махум ёлнэ
ос рүпитан маныл



Сёрни ловтнэ ут я ватат ўнлы

уртавѐг, сѳрни лѳмтыт хот-сыстамтавет.

Ос я вѳтат тасѳвит вѳнхат экскаваторыл хилым ѳлѳгыт, тув рѳктың вит сѳсантѳгыт, вит тот ѳнлы, рѳктѳ ѳл-ѳнты, та вит сѳрни ловтнѳ мѳгсыл ѳс та выганыл. Татьяна Степановна лѳвыс, ос хунь вит илттыг ѳнтуңкве паты манос илттыг сака сѳв ракви, тѳнт ты вѳнха тѳгиньты, пѳнкың витѳн та нуясаптаве. Сыстам витуп ѳт рѳктыг та тѳлыглавет.

Тох рѳпитым, сѳрни ловтнѳ мѳхум мѳвитув сака пѳнктаыныл, хѳлыт сѳрункве алгаль ат минѳгыт, пилѳгыт, сѳвсыр мѳшинат кургѳгыт, витѳ пѳнкың, таимѳгыс хѳл мощцаг та ѳмты, ѳйхул та мѳныл сысы мины. Лѳнхаль ѳлнѳ пѳвлың мѳхум тай пѳнкың вит та аѳгыт, хѳл мощцаг ѳмты, мѳхум манараныл тѳгыт. Хотѳют хоталь вѳрми, мѳт мѳн ѳлуңкве та вѳнтлѳгыт. Воссйг хоталь вѳрхатѳгыт. Мѳн ань мѳныщи пѳвланув акваг та тѳтламѳгыт.

Сѳрни тиснѳ мѳ Нѳхщамвѳльныл алгаль яныгсѳт вѳрыста палытат ѳлы. Рѳпитан мѳхум тыглѳ-тувле Тѳрвѳт пѳвыл тѳра яласѳгыт, тот Самбиндаловыт мѳныщи щѳмья ѳлы. Тѳн ѳлнѳ мѳныл тракторыл ос вездеходыл пулигялыглаве, таимѳгыс Татьяна Степановна сыме ѳс щѳрги. Мѳтѳв, сыстам витуп Нѳрѳнув пѳнктавет. Щѳлың компаният рѳпитѳнкве ѳхталѳгыт, ѳлнѳ мѳнув, сыстам янув пѳнктавет, я вѳтат нѳнхаль-ѳхтыртавет, тувыл тѳн ювле та тахѳгыт, туп харѳаиң тѳрсуپаныл хулытѳгыт. Мѳн мѳхманув туп тѳ-

тыл кѳтаныл рѳтащлым та хулытѳгыт.

Ос вѳим кос, сѳрни мѳн госуларствавн ѳри, сѳрни тѳл сѳвсыр ищхипың утыт рѳпитѳнкве ат патѳгыт, пальщимщакыт, тулят, сакквѳлгыт вѳравет. Ос маныр щѳхлаңыл тав нѳх-виве, ты урыл мощща хѳтпа вѳг. Сѳвсыр департаментыт пуңкотнѳ мѳхум ос ѳкруг кѳщаит такос хѳт-ѳти лѳвѳгыт, мѳ-витув ѳргалылув, мѳ ат ѳри пѳнктаңкве, ос сытам мѳт, хѳт мир мощща, тох та тамле рѳпата вѳрункве тѳртыяныл.

Сѳрни ловтнѳ мѳныл мѳн Самбиндаловыт щѳмья ѳлнѳ мѳн тыламласѳв. Тот вертолѳт ѳл ат пѳилттѳлвес. Мѳн молях тот пѳслысѳв, Савва Татьяна ѳкватѳнтыл, тит пыгагѳн Андрей ос Олег ѳлсыт. Ам туп коланыл ос кон хѳйтыгтан кѳтѳврищаныл пѳслуңкве ѳлымасум.

Савва тит пыгаге хѳпыл Ирина ѳщѳн нѳврамың тагыл пѳвланылн тотуңкве Нѳхщамвѳльн минамѳг. Акв Ольга ѳгитѳн сѳрни ловтнѳ мѳхум палт тѳнут пѳйтым рѳпиты, мѳн тув ѳхтумувт тав атың нѳнь вѳрум ос щѳй пѳйтум. Ирина ѳгитѳн ос тот рѳпиты, тѳн пѳнтхатѳг, акватѳн ѳтпос рѳпиты, юв мины, мѳтанѳн ѳхты. Тѳн тот ты тѳя ущ рѳпитѳнкве патсыг. Лѳвѳг, Нѳхщамвѳльт торың рѳпата ѳтим, таимѳгыс тув рѳпитѳнкве вѳйхатсыг.

Мѳныщи щѳмьян мѳн пуѳтагыл ѳлнѳ лѳтың тетѳв, пыгыт вѳраян ос хѳл алыщлан сѳт вос ѳныщѳгыт. Пуссын Тѳрум ѳт, ѳтыр ѳт вос ѳлѳгыт.

Галина КОНДИНА



Тѳрвѳт пѳвыл нумыл пѳслысум



Савва кѳщаиг ѳт потырты



Т. Гоголева ос Н. Алексеева Самбиндаловыт щѳмья ѳт пѳслым ѳлѳг



Пуписумный ӧлнэ щемья

Түяг Ханты-Мансийск ӱсн пусмалтахтуңкве Александр Владимирович Хозумов ёхталас. Тав Хальӱс район Лӧпмус павылт ӧлы. Ам таве хосат тагыл ваӱлум, мён пӱльницат ӱнлахӧлсумён, потрамасмён. Ам таве ӧлупсатэ урыл моц титыгласлум, хӧт самын патыс, хӧт яныгмас. Тӱн Пуписум махум, пёс порат тӱн та павланылт ӧлсыт. Ань мён Сашал потрумён ӧлалъ ловинтӧлын:

— Мён Щёртимтыл юртың нӱврамыг. Тӧнт омагум-ӧтягум иң Пуписумт ӧлсыг. Мён самын патнэмён ӧлы-пӧлт омам хӧпыл Лӧпмусын тотвес. Тӧнт «Пётр Шлеев» нӱиңхап яласы, нӱиңхапыл тав Кульпасн ми-нас. Мён тот туи ӧйттур ӧтпос 17 хӧталт 1960 тӧлт самын патсумён. Мӱн щемьявт ӧлӧв — яныг каңкув Валера, тувыл мён Серёжал, Лёня ӧпшиков ос Та-ня ӧшув.

Пуписумт пуссын рӱтанув ӧлсыт. Сонька ӧквум, ты ӧтям тав увщитэ, Каллистрат, ӧтям ӧпщитэ. Пёс порат Ущтин ӧпам тав тот ӧлыс, тӱн хӱрум ягпыг Унтари, Петр ос Ущтин ӧлсыт. Хунь мён ханищтахтуңкве патсумён, тӧнт мӱн Лӧпмусн ӧлмыгтасӱв. Тот хӱрум класс мус ханищтахтасӱв ос ӧлалъ Кульпасн тотавӧв, тот интернатыт ӧлсӱв. Мён лов класс ӧстласмён, та юи-пӧлт армиян вуйвесамён. Ам ӧвлӧт Московский областит хӧт ӧтпос армият ханищтавӧсум, тувыл Хабаровский крайн тотвӧсум, тот служитасум.

Юв ӧхтысум, Лӧпмуст охотникыг ӧлсум, ПОХн

минэ маӱсыл алыщ-ласум, пил вӧтсум, сӱйпил лӱпта, вӧльйив атсум, тох титхуй-плов тӧл рӱпитасум. Ос хунь ПОХ лап-пант-вес, ам рыбоучастокн патхатсум. Хӱл алыщ-ласум, тох акв тӧл рӱ-питасум, тав ос хот-вуйвес. Ос тӧнт Ламбин хум община ӧнъшас, тот ат тӧл рӱпита-сум. Ётыл «Рахтынья» общинат договор ши-рыл рӱпитасум, хӱл алыщласӱв.

Ань ам щемьяң, ӧк-вамӧнтыл хусахтем тӧл ӧлымён. Мён ат нӱврам ӧнъшимён, хӱрум ӧгиянум Лена, Люда, Саша школат ха-нищтахтӧгыт.

— **Саша, омагын-ӧтягын наманӧн лӧвен. Тӧн урӧнтыл моц ос потыртӧн.**



Александр Тамара ӧкватӧнтыл

С.Ромбандеева вӧрум хуриг

— ӧтям наме ӧлыс Владимир Устинович, тав хосат ӧтимыг ӧмтыс. Ӗлмӧт акваг ос вӧрт алыщлас, туи акваг толгысыт, тӧлы хӱлп ӧнттысыт. Мӱн акваӧт таквсы пил вӧтыгласӱв, тыналан маӱсыл сӧв пил атыг-ласӱв. Омам Елена Константиновна наме ӧлыс, тав такви ӧпарищ наме Юрьева. Омамтыл мӱн акваӧт ӧлсӱв, ам ӧгия-нум пуссын ӧлсыт, тӧнт тав ӧтимыг ӧм-тыс. Тӱн пуссын та порат хӧйтыгтасыт, потыртасыт.

— **Ам ваӱлум, наң ӧсат, хӧпыт вӧруңкве хӧсӧгын. Ань матыр вӧрыглӧгын?**

— Ам маңьхапыт, ӧсат, тӱпыт, саран-хӧпыт, суныт, сӧграп-налыт вӧруңкве хӧс-сӧгум. Тӧва махум ӧнумн вӧрылтӧгыт. Голошубин общинатэ маӱсыл ам саранхӧ-пыт вӧрсум.

— **Акв тӧл ам но-милум, мӱн Лӧпмус-ный Сӧрахта хосыт катерыл ми-на-сӱв, ту-выл ӧлалъ Хулюм хо-сыт ос хӧпыл. Тот хум хӧтпат пӱрлахтын мӱн ми-на-сыт. Ты урыл ос моц потыртӧн.**

— Ты мӱн Тӧрум канын ялсӱв. Нӱн, нӧ махум, Хулюм ты-палт хулытсын, тот нӧ хӧтпатын рӧви, мӱн ос ӧлалъ Тӧрум ка-нын пӱрлахтуңкве та ми-на-сӱв. Ты 1997 манос 1998 тӧлыт по-рат ӧлыс. Тӧнт мӱн тув лув тотыгласӱв, йирхатсӱв.

Яныг махманув по-тыртӧлсыт, Хулюм ӧлумпӧлыт сӧт уча ӧн-лӧгыт, кан ӧргӧлӧгыт.



Тамара ӧкватэ мис посы

ПУСМАЛТАН ВАРМАЛЬ

Тан мәннүв хумия-
ныл канын тетыяныл,
тав сунсы ос лави:
«Мәхманув ёхтысыт».

Атым, сасгум потыр-
талсыт. Илья хотал
тувле ялантасыт. Анъя,
Лопмус, Сакв толих
махум, Тагт махум ак-
ван-атхатёгыт, пур-
лахтёгыт, касёгыт.
Хурум каснэ хәп ол-
сыт — Лопмусныл хәп,
Мувынтёсныл хәп ос
Хорыңпавылныл хәп.
Ойкат касёгыт, тупыл
та товёгыт. Каснэ хә-
пыт янгыт, хәпн тәлэ-
гыт, канын товёгыт,
хотыутаныл моляхнүв
ёхты. Лопмусныл Яныг
Сорахта хосыт товё-
гыт, Хулюм ян щалтэ-
гыт. Тот ятэ тосам те,
Хулюм сунтыт лаг-
лыл минёгыт, хәпаныл
хультуптыяныл. Тув
лув тотёгыт манос сә-
лы. Йирхатёгыт, пур-
лахтёгыт, тот ос касё-
гыт, пёрщёгыт.

Мән тонт ялмүв юи-
пәлт воссыг нәмхотыут
ат ялыс. Пёс махманув
тэлы сәлы, туи порат
лув тотёгыт. Хунь сә-
лың махум тэлы нёр-
ныл нәлув вәглёгыт, та
порат ялантасыт.

— **Нан юн нанти ха-
лынт мәнщи ләтңыл
потыртэғын мән ати?**

— Мён эквамён-
тыл халмөнт мәнщи
ләтңыл потыртмөн,
нәвраманмөн ёмщак
торгамтёгыт ос мощ
потыртэгыт. Щар мак
потыртаңкве ат вёр-
мёгыт.

Ты мәнщи щёмь-
ян ам пуштагыл өлнэ
ләтың лавёгум. Алек-
сандр Владимирови-
чин потре магсыл
пумашипа ләтың тә-
тёгум, Төрүмн вос
нётаве, моляхнүв вос
пусмалтахты. Нәвра-
манэ ёмас хотпаг вос
янмалтыянэ.

**Галина
КОНДИНА**

Саранпавыл пұльница

Тэлы Саранпавыл ялмүв порат пұльницат лёккарыт ос тот рупитан махум ёт вайхатасүв. Тан пуссын рупатаныл ос олупсаныл овылтыт потыртасыт, нан ань кұшай вәңын хум Владимир Иванович Ефимов потре ловиньтэлын. Тав лавыс:

— Мән пұльницавт сәтлов сәвит элумхө-
лас рупитэгыт. Това-
накт эрнэ лёккар тәл
патыглёв, нә хотпат
мән нәвраманыл ёт
юн олэгыт, мөтаньт
пенсиян патхатэгыт.
Мәхманув пусмалтаң-
кве эрнэ лёккар тәра ат
ке хөнтэв, тән район-
ный пұльницаныл мощ-
щан тыг вөвиньтәлавет.
Мәнки яныг махум ос
нәврамыт пусмалтан
лёккарыг аквал-аквал
ке оныщёв, тии ос люль.
Пәвлүв яныг, аквторыг
сәв агмың хотпат ёт
рупитаңкве тәнаньлн
тәрвит. Тувыл ты ляпат
өлнэ пәвлыт ос тыг ло-
виньтавет, махум тән-
ки пусмалтахтуңкве
тыг ёхталэгыт. Ань акв
терапевт ос кив. Педиатр
пұльницан ёхталан ма-
хум пусмалтэг, агмың
элумхөлас палт юв
колән ялнэ пора щар
әтим. Таквсы ос туюг
пәвлыт халт яласаңкве
тәрвитың.

Мөт тәрвит, тии аг-
мың махманув тыт
тәрпи ёвтуңкве ат вёр-
мёгыт. Сартын Хальүс
аптеканыл тәрпи то-
тыглавес, Саранпавыл
аптека олыс. Ту-
выл экономикат мөт
вармалит патсыт ос
Хальүсныл мән пәв-
лытын тәрпи тотнэ на-



В.Ефимов хум пусмалты

кыт ёл-пөилттавёсыт.
Аман лицензия-нәпа-
кыт магыс иң та по-
тыртахтэгыт, аман ос
мөт хотты вәрмалитн
ёл-пувавет. Махум
тәрпи тәл савалэгыт,
товат мөт үст рутанылн
ёвтавет ос тыг та кёта-
вет. Мән тай пұльницав
магыс Хальүсн заявка
хансёв, тувыл матыр-
әти пормасыл, тәр-
пил тотыглавёв. Агмың
элумхөлас палт ялнэ
манос таве пұльни-
цан тотнэ магыс ёмас
мәшина ат оныщёв.
Район кұшайт ты урыл
вәгыт кос, ос торың
нәматыр ат вәрёгыт.

Ищхипың пусмалтан
утил ос вәрвесүв. Туп
лёккарытыл ат төвлавёв,
мөт мәныл хотты лёккар
тыг рупитаңкве ёхты
ке, тав өлнэ колыл миве
тах. Пұльницат мәнлат
хотпат ос рупитэгыт кос,
туп тәнаньлн сака молях
рупитан интернет әри,
өлнэ коланыл исум вит,
рег вос оныщас. Пәвлүв
сака элын олы, мәнлат
махум тыт олүңкве ат
таңхёгыт, вәим, сысы
минёгыт. Ань тыт хи-
рург, педиатр, ұлщпұңк

пусмалтан лёккар ос тә-
наньлн нётнэ хотпат
олэгыт. Тан хосат тагыл
тыт рупитэгыт, тәнки
рупатаныл сака ём-
щакв вәганьл, мұсхалыг
вәрияныл. Эрнэ торыг
элаля хаништахтуңкве
ялантәлэгыт. Ам тыг хус
арыгкем тәлт Белгород
үсныл рупитаңкве ёх-
тысум. Тыг акв румаңн
вөввёсум. Ёлщпұңк пус-
малтан лёккар Марина
Петровна нәврамыңыг
ёмтыс ос тыт махум пус-
малтаңкве әрыс. Ам тыг
ёхтысум, тав пөнтсылэ
мощ рупитасум. Аңумн
тыт мұстыс, тыт та
хультсум. Щёмьям тыг
ос тотыгләлысум, эквам
Нёр ахватас киснэ колт
рупитас, пыгум институт
әстлас, тыт рупата ат
хөнтсыг ос мөлал ювле
минасыг. Саранпавылт
олүңкве манаре люль,
витув ос лылыёп сыс-
там, махманув өлнэкө-
мыл олэгыт.

Мән ань тәнаньл
пуссын лёккарыт ял-
пың хоталыл янытлы-
янүв. Пус кәт, пус лагыл
тәнаньлн, Төрүм ёт,
Отыр ёт!

Тамара МЕРОВА

Таборы павыл хум

**Виталий Фёдорович Мясников Свердловский
Область Таборинский район Таборы павылт
өлы. Ты нэпак хаснэ руц хум школат сав тал история
учителиг рүпитас. Та мат өлум маныщи махум тав
васанэ, номиянэ. Тав урёт аномн Тавда үст Лесной
ос деревообрабатывающий промышленность музейт
рүпитан махум лавсыт.**

Ман, маныщи хөтпат, хунь Виталий Фёдорович урыл хулсүв, татем щэгтсүв, тав палтэ машинал ялапалсүв. Тав хөтпа нупыл сака ёмас ойка, татем потрың. Манава колэн вөвыстэ. Экватэ наме Александра Ивановна, аквёет тэн хөтпан нупыл сат тал өлэг, кит пыг янмалтасыг. Ман китыглахтын латың сав өшсүв, ойка маттем та потыртас. Нан ань элалэ тав потре ловиньтэлйн.

— Тыт өлум маныщи махум ам васанум, тан ётаныл юртыңыщ өлсум, аквёет рүпитасүв. Ам Чернавская павылт яныгмасум. Ляпат Кошня намп маныщи павыл өлыс, тувыл хөнтаң маныщи няврамыт ман школавн тотыглавёсыт, аквёет ханищтахтасүв. Оманыл-атяныл наманыл ам пуссын васанум.

1741 тал порат ты ман Г.Ф. Миллер, нэпак хаснэ хум, ёхталас, маныщи павлытн хөиглас, пүмщалахтас, маныщи махум хумус өлэгыт, маныр тэгыт, тананыл пөслысанэ. Хунь юв минач, «История Сибири» нэпак таратас, тот тох ты хансыс: «Маныщи махум хуланыл ат щёпитыяныл — палыг ат яктыяныл, ат нилияныл, тох пётыяныл. Тав улпыл тарка хул пүт лавылты. Ты хул нас тох пайтаве, тав сам ат оныщи, воцраме ат воциртахты. Ам номилум, маныщи махум тамле пүт пайтсыт. Пүтаныл хуныяныл,

мувлахи үнтэгыт, та тэпьялэгыт. Ос мөт хул, шапак ман сыг, тох те пайтэгын, наң тэңкв ат вёрмёгын, сака воциртахты. Тарка хул исмитэ сака атың. Кос маныщи, кос руц, манос йиври хөтпа, тамле атың хул пүт касың тэңкв паты.

Ань нэпак хаснэ төва хөтпат хөт матыр касалэгыт манос хунтамлэгыт, пуссын нэпакын та хансумтыяныл — ты щирыл, та щирыл та өлыс. Маныщи махум хул щёпитаңкве хассыт — яктуңкве, солвалтаңкве төслуңкве ос мөт матыр воруңкве пуссын хассыт. Тан хул алыщдасыт, вора-ясыт, хул ос нёвыль таим олсыт.

История тэла ам мань тагыл пүмщаласлум. 1950-й талыт порат маныщит ёт потрамасум, төнт 80 тал арыгтем яныт яныгхөтпат өлсыт. Тыт өлум соссан махум өпарищ наманыл тамлет өлсыт: Храмцовыт, Фирсиныт, Илькиныт. Нан ань тыгле Кузнецово павыл тара йисын, элнаң тав тох лаввес: «Павыл Кулебяевка». Тот янгыщ маныщи мир өлыс. Та павылт яныгмам маныщи хум Николай Васильевич Храмцов сав тал Тюмень үс пүльницат рүпитас, медицинский наука доктор ос академик хөтпаг өлыс. Мён тав ётэ юртыңыщ өлсумён. Ойка хотталы щалтме китыт талыг ты ёмтыс. Тав хурум апищи оныщас — акваныл



В.Ф. Мясников

кол үнттын мат рүпитас, китыт Данил ань Мостовка павылт өлы, Васяныл шар мань, катерыл яласас. Яныгмам коланыл я ватат үнлыс, тан нила ягпыг павланылн ватихал ёхталасыт, коланыл уральталсаныл. Акванатхатыглалсыт, ам палтум ёхталалсыт, аквёет үнлахөлсүв, потрамасүв. Тувыл хунь аврах ёл-нильвес, коланыл ян патыс.

Акв маныщи хум Александр Емельянович Безыментов актёрыг өлыс — Василий Шукшин, Георгий Бурков ос мөт намыңсуиң актёрыт ёт «Они сражались за Родину» кинат пөслувес. Тав 1931 талт Аверинский павылт самын патыс, тот яныгмас. Аверинский, Фунтосово, Шайтанское, Галкино, Сотниково — ты пуссын маныщи павлыт өлсыт. Маныщит элнаң өпарищ нам ат өшсыт, хумус хансуңкве тавагт, улпыл руц хөтпан өпарищ наманыл тох та хансумтавес — Безыментов (тав өпарищ нам ат оныщи).

Тыт ань ман колув пөхат Зоя Сотникова өлы, тав маныщи нэ, Сотниково павылт самын патыс. Такви латңе ат вэгтэ. Ам ты лавёгум, тыт хосат, 60-70 тал ювле хультум порат тан щань латңаныл хотталы сөймуңкве патыс, мөрсың хөтпа такви латңётыл матыр лягалалыс. Та пасыл сав вит овис, сав тал минач, таимагыс нан тыт ань латың ванэ хөтпа ат хөнтэгын. Та махум пуссын мөт мир халн тэлыгласыт.



Кошук павыл

Ты мāt сāv пāвыл, я ос тӯр мāньщи лātңыл намаим ӯлэ-гыт — Куях, Шуньжа, Вагнер, Колышья, Кылья... Чёрная речка элнаң тох лāvвес — Сэмыл-я. Ам хунь вōраяңкве патсум, вōрт ёмыгтэґум манос хул алыщлэ-гум, мāньщи намыт пуссын тара-паттысанум.

Пēs тағыл мāн мāvн суты-тым мāхум тотыглавё-сит, тыт турманкол сāv ӯлыс. Мāньщи мир коньпал тыт вос-сыг нэмхотыют ат ӯлыс. Мōт мирытныл нас тох ӯлуңкве тыг нэмхотыют ат йис, пуссын ёр-вāгыл тыг тотвёсит, тōват ос тыг рӯпитаңкве кетыглавёсит. Тувыл мāхум коланыл ӯнттын мāгыс мā ломтыл миңкв патвёсит — белорусыт, полякыт, чувашит ос мōт мирыт тыг вāнтлуңкве патсит, тыт акваг та ӯлмыгтасыт. Мāньщи агит мōт мāныл ёхтум хум хōтпа палт минуңкв патсит, тувыл лāщал-лāщал лātңаныл та ӯстысаныл. Тōваныл ос ань вōраим Кондинский мā нупыл минасыт, тувыл тот акваг та ӯлмыгтасыт.

Хум хōтпат акваг вōраясыт, хōт эрың матыр кāsалэгыт. Мāнь-щи хōтпа писалъ ёт ат те ӯныщи, сыме щāргуңкв паты. Писалил пātлуптаңкве тāн мāньтагыл хāссыт. Ос нас тох ат пātлупта-сыт, сэля-саквняланыл юв-ӯрса-ныл. 5-6 классыт ханищтахтын нйврамыт ӯс вōраясыт — нэхс ос совыр пувёгыт, кёрнялит ӯнт-тэгыт. Туяг алпыл хӯрум щёст нōх-квāлапёгыт, вās пātлуптаңкве хāйтталэгыт, тувыл пыгрищит урокытт та ӯсыньтэгыт, āла ёл-оявет. Вōркол сāmт тāн щёвал ӯщсыт — пālтыглахтасыт, тәнут

пāйтсыт, тувыл тав лāмпа пос пēнтсыл ӯлыс. Пāвыл коланылт ӯс щёвал ӯщсыт. Вōраяманыл ос хул алыщламаныл коньпал хум хōтпат кāтыл матыр мāщ-тырласыт — анысаныт, сыре-сыр нйлыт, сэтап вāрнэ пряткат вāрсыт. Нё хōтпат ос маснут йōнтсыт, лāгыл маснут — вāит, нйрат, тувыл мольщāныт. Лāгыл маснутаныл мāн тох лāvсанӯв: Кошинские нйры.

Мāньщи мāхум халанылт мхоты рӯтыл ӯлсыт, пус-сын ёмашакв вāsаныл. Тэлы ань кон ащирмāң, пуссын юн ӯлэгыт, яныгхōтпат мāнылат āги-пыгытн пēs йис ӯлупса урыл сāv потыртālсыт — элнаң мāхум хумус ӯлсыт, хоты мāныл ӯлсыт, рӯтаныл хотыют та маныр, ты урыл тāн кит хӯрум щёс хулыг-ласыт, таимāгыс кāсың хōтпа мāнь тағыл вās.

Ам яныгмамум порат, номилум, нэмхотыют ат лāпалахтыглас, ат урккыс. Мāхум кол āвияныл лап ат тумантālсаныл, вōрколаныл ӯс пāлыг ӯлсыт. Ань ӯлупсав щар мōт хурипа — элумхōлас лāпалāлаве, эрнэ матаранэ хот-нёлмыгтавет. Ань туп ӯргалах-тым ӯлуңкв эри, āвианув ту-мантыанӯв.

Мāньщи мāхум элнаң вōрт хотыютн сакватым ӯйрищит ос ӯйхулыт пуссын юв тотыяныл, пусмалтыяныл, тувыл ущ вōрн тāртыяныл. Тāн Тōрум нупыл сака суссыт, тāнти Най-Отыраныл сака янытласаныл, тāн нупланыл пōйкщасыт. Пурлахтын мā ӯщсыт, тув ялантасыт. Ермак ӯйка тыг ёхталаме юи-пāлт мāньщит пус-сын ёрвāгыл пӯпколн вōвуңкве патвёсит, тот пёрнапос вос пинэгыт, христианский Тōрум



©. Ефремова, З. Сотникова
ос С. Матыков

нупыл вос сунсэгыт. Ты мāt сāv пӯпкол ӯнттувес. ӯвлэт тыт, Таборы пāвылт, 1621 тāлт ӯнт-тувес. Мошёрытн тав 400 тālэ тōвлы. Кошуки пāвылт сака ёмас пӯпкол ӯнлы, тот элнаң пуссын мāньщит ӯлсыт.

Ам школа āстламум юи-пāлт армиян ялсум — товлыңхāпыл яласаңкве ханищтахтын школат кит тāl лусытасум. Армия юи-пāлт кит тāl хōнтлын полкыт рӯпитасум, товлыңхāпыл яла-сасум. Тувыл юил ялантым Свердловск ӯст ӯлнэ Горький нампa Уральский университет исторический факультетэт ханищтахтасум. Ам акваг школат нйврамыт ханищтым рӯпита-сум, эквам ӯс школат 52 тāl рӯ-питас. Ань сас пенсият ӯлымён. Пыгагмён ӯс мён ляпамент ӯлэг, сас колтагылыгы ёмтсыг.

Виталий Фёдорович такви мātэт намың-суиң хōтпаг ӯлы. Яныгмам мātэ тав сака эруптытэ. Пēs ӯлупса ань ты хōтал мус ханищтытэ, та мāt ӯлнэ ят ос тӯрыт наманыл пуссын вāганэ. Тот ӯлум мāньщи мāхум сака янытлыянэ, тāн ӯвылтаныл сāv ёмас лāтың лāвыс. Тав «Табо-ринские истории» ос «Знай на-ших, таборинских!» нёпакыг хансыглас. Тувыл ӯйка мовинь-ты, такви лāvме щирыл, яныгпā-лаг ёмтыс ос стихыт хансуңкве патыс. Акв нёпак тāратāлыс, тох намаястэ «Отзвуки прошлого». Ань ос китыт нёпак щёпиты.

Ты ёмас элумхōласын, мӯтраң хōтпан ам сāv ёмас лāтың, пӯ-машипа лāтың лāвёгум. Колтā-гыл мāхманэ ёт пус кāt, пус лā-гыл вос ӯлы, Тōрум ёт, ӯтыр ёт вос ӯлы!

Светлана РОМБАНДЕЕВА



Т. Макарова, ©. Ефремова, С. Ромбандеева, В. Мясников,
С. Матыков ос М. Макарова

Мирн вāнэ мāньщи поэтув стиханэ

Мāньщи поэтув Юван Николаевич Шесталов ты тāl лўпта этпос вāt нупыл титыт хōталт 80 тālэ тōвлынуv. Ты шар бōыл мāньщи поэтув, тав стихыт, потрыт мāньщи лātңыл хансыс. Ётылнуv рущ лātңыл хансуңкве патыс. Овыл нēпаке «Мāкем ат» 1958 тālт тārатастэ. Тот такви мātэ урыл стихыт хансыс. Ань мāн «Сāйкаланэ эрыг» нампa нēпакет хансым стиханэ газетан вāрианўв. Ты стиханэ 1965 тālт нēпакыг вāрвёсыт.

Поэма

Лāвыглаве: эрыг шармат

товлың ўй
Элумхōлас сымыт пити вāри.
Суиң эрыг мари — сумлы лўщнэ суй,
Элумхōлас лылы лāщлакв мари...
Эри нёвитаңкве тамле эрыгсов —
Вōй хольт сымыт палт вос ови.

Ат ке маныгтāлсум пāкв хольт тōрум
сов,
Суиң космонавтыг ат ке бōлсум, —
Овнэ эргум хāп хольт хоталь тови?
Мāньщи мирум хоталь, хоталь вōви?

Ўнлахōлирищум, номсырищум:
Шармат янгыг ёмтыс мāнь āгирищум,
Ам нуплума яныг хōтпа сунсы,
Китыглахтын саме ам палтум
нўнсы...

— Хōңхаг бōлыс āщум?
Ёмас маныр вāрыс?
Эрың сōрни хўлкве
тэс тав тōрум мāгыс?

Сэр-мор вōр хунь тōрги
вōтпыг ёлы-пāлт,
Сэрипос хунь хорги
ййвыт нуми-палт —
Сымум нупыл сунсы мирум посың
сам,
Элалэ бōлнэ нотын китыглавем ам!

Овыл эрыг

Эргум ови, ови.
Эргум хāп хольт тови.
Хōт тав косамлāлыс?
Хōт тав сāйкалāлыс?

Хунь саяум хўлыл пасыс
Элумхōлас саме,
Хунь шарка палт нўнсыс
Апрың лāглуп номтэ,
Хунь шармат вōртōлнут
Опам вōрыт ёңхыс,
Хунь савың хōтпа сымёт
Лавың марщум рōңхыс, —
Эргум тувыл ови,
Тувыл хāп хольт тови!
Хунь вōтас хольт ярум
Мāкве хосыт ялыс,
Хунь хунтыль хольт вōйңыг
Вāтахуми бōлыс,

Хунь āщум аюм бōпамн
Касырл касырлāлвес, —
Сāйкаланэ эргум
Тōнт та сāйкалāлыс, —
Эргум тувыл ови,
Тувыл хāп хольт тови!

Хунь тыналыма āщум
Мётхумыга вāрвес,
Хунь тўйт-вит халт āщум
Этэ-хōтал ларгыс,
Хунь рўпата хум кāсэ
Мōт хум щёпыт воргыс,
Хунь тав сыме щāргыс,
Номтэ ўй хольт поргыс, —
Эргум тувыл ови,
Тувыл хāп хольт тови!
Исум лўщвит рёгыл,
Тўя хōтал рёгыл
Яңк-тўйт толуңкв патыс,
Посал эргалтахтыс:
— Ленин, Ленин наме
шармат эткве саме

Уи войкан эт ёт,
Пашалахты сōт ёт, —
Эргум тувыл ови,
Тувыл хāп хольт тови!

Хунь Ленин вāрмалы тотуңкв
Мётхум-āщум лўлис,
Хунь кулак, шаман шахны
Сысэт, сымет хўлыс.
Хунь колхоз мāхум ёре
Щахнын атыглāлыс,
Хунь колхоз сōт ёт наме
Ййв хольт яныгмāлыс, —
Сāйкаланэ эргум
Тōнт нōх та сāйкалас!

Сōрнил щултгын пāхың Āсумт
Рёгың вōтпыг пилыл пасы,
Вōркем хосыт сўлынтэгыт
Сāлы пўрнэ ўит хунь?!
Рёгың самыл колыт сунсэгыт,
Сунсы мāкем самың щунь...

Туп атыр тōрумт аквтох ханы
Этпос шармат сōрни āны,
Туит пёс йис мōйтың матум
ўльпат
Лāщлāкв вōрытт нёвсантэгыт,



Ўлмум мōйтыл нёвитэгыт,
Сымум хўлп хольт нёвумтэгыт,
Йис эрыгсовыт сāйкалэгыт.
Самум шармат посымн тэве —
Косамлаве, косамлаве...
Пёс йис нуса лўньщиң бōлтул
Мōйттāl хуньпыл ёрувлaвe?!
Сāйкалэна, сāйкалэна,
Оилматым сымыт!
Нёвумтэна, нёвумтэна,
Сымумт āщум номтыт!
Сымумт пёс йис лўщ вос сольги.
Эргумт ты йис кāс вос хольги.
Тувыл, тувыл тав вос ови!
Тувыл хāп хольт тав вос тови!

Китыт эрыг

Сōрни щāнь хунь бōньширищум,
Хотьютн хунь хулавем.
Наскāссыг ам лўньширищум,
Нэмхōтпан ат сāлитавем.
Хунь раkv вōвнэ тахыт лўньщи,
Тулытн тав хўлаве.
Няхнэ āмпкой щāнькве бōньщи,
Щāнён нёлмыл вотаве.
Сōрни тынпа лўщвитакен
Наскāссыг ул паргалтэн,
Нярпум хурип сымың сымкен
Наскāссыг ул щāргалтэн.
Мōт хум лўщвит кāсалы ке, —
Асталакве мовалы;
Мōт нэ лўщвит кāсалы ке, —
Нарың лāтың лягалы.
Мōт хум сыме — пёлпа порхай,
Порхайн ул пёлавен!
Мōт нэ лātңе-хўснэ хусай,
Хусайн ул хўсавен!
Туп ам сагың хōталкāтын
Сымум лўщвит тōславе,
Туп ам āтың пуңкātум

Нарың маквен му́стлаве.
 Сөрни щань ат оныщегум ке,—
 Сөрниң макве оныщегум;
 Щаньтәл сымыл лю́ныщегум ке,—
 Посың хотал оныщегум.
 Вос кос ва́ри яныг турап—
 Хотал нә́глы аквтыпыл;
 Рёгың хотал щаню́м хурип
 шуниң кә́сум ёхтыгпи!

Хүрмит Әрыг

Тының лүи ма́кем,
 Ләвен, хумус олу́нкв?
 Манахурип лё́нхыл
 Макве хосы́т ёму́нкв?

Рёгың ма́глың щанькем
 По́лям ма́квен войвес,
 Па́квсам яны́т сымум
 Түйты́т халы́т хульвес.
 Вóтыт са́ка ня́нрат,
 А́лты ё́л-патта́вем;
 Ня́лың ащи́рманә
 А́лты тая́па́вем.

Ййвы́т карсы́т Ме́нкв хольт
 Лүи вóтпыг ки́сги,
 Ма́нос савы́нканы́т
 Щарма́т хóтпа щисги.

Матум Та́нва́рпё́ква
 Илтты́г самы́нпаты;
 Сымум та́рыг па́кв хольт
 Ма́квен та́ рагаты.

То́рас карсы́т пупгы́т
 Номты́н ёхты́гпёгы́т.
 Э́рың со́ль ты пупгы́т
 А́нум са́литёгы́т?

Туп пу́нк а́гмыл ё́мты,
 Вóтас хольт та́в ё́нхи.
 Хот са́р, хóт са́р о́лы
 О́лнэ шуни́ң лё́нхум?

Вос кос са́ка ха́сы
 Ка́тум писа́ль пуву́нкв,
 Та́в со́ль, со́ль ат ве́рми
 Ме́нквы́т ня́лыл алу́нкв.

Пилупта́хту́нкв паты
 Аквто́х Та́нва́рпё́ква...
 Илтты́г хотты́л нә́глыс
 Ле́нхумт акв ру́щ э́ква.

«Ё́мен, сохты́л, ё́мен,
 А́нумны́л ул пилэ́н!
 Ми́нымёна мо́лях
 Ха́нищтахты́н шко́лан».

Сымы́ң ла́тнуп щань хольт
 Ма́нав ха́нищтаса́нэ.
 Та́нва́рпё́кват, пупгы́т
 Сы́мныл ня́влыса́нэ.

Тү́я ма́кве хольт ам

То́нт у́щ лы́лаясум,
 Э́рың шуни́ң лё́нхум
 То́нт та хóнтыгпа́слум.

Нилы́т э́рыг


Хо́тал сө́рни паркан ла́кв хольт
 То́рум хосы́т ла́рги,
 Во́й хольт во́льгын па́хың Та́гт во́льт
 Суи́ң мото́р па́рги,
 Щаньке́м! Но́тын ва́ти о́лыс,
 Мо́щ вос ё́мты хо́саг!
 Сунсэ́н: сы́мум ви́тыт ха́йты,
 Щарма́т о́ныщи ё́саг.

Сы́мум на́ң нэ́ сымы́нт те́лыс.
 Ху́нтлэ́н: сы́мын ра́ты!
 Ма́ныщи ма́хум ё́мас сы́мын
 Э́рги то́влың ха́пы́т!

А́тху́нь э́рги, а́тху́нь ща́рги!
 Ты́т на́ң самы́нпатсы́н;
 Хо́рам та́нхпа сө́рни ху́л ё́т
 Ты́т на́ң яны́гмасы́н;
 А́нум щарма́т понсы́м сүйпи́л
 Э́рпы́щ майлы́гласы́н.
 Ты́т тү́р со́рыт ху́лпанме́на
 Суйта́л ка́тыл пувиньта́сыт
 Во́иң ху́лкве. Ху́лкве ра́тыс:
 Витса́мрищи́т суртта́нтасы́т
 Щарма́т саквы́ң са́хи саквы́т,
 Ня́ли-кисы́л ва́рим саквы́т...
 А та́ тү́р яс а́лумпа́лыт
 На́ңк ййв щарма́т то́румт ха́ны.
 То́влың на́ңк ййв ё́лы-па́лыт
 Э́тпос а́тыл пасы́ а́ны,
 Лы́лың ху́лыл ху́ным а́ны...
 Тот ме́н ху́л те́щинта́смё́н,
 Та́квсипа́лаг во́раясме́н,
 Апы́р ле́нны́т алы́щласме́н...
 Ха́нсы у́ты, у́ты, у́ты —
 У́льпа то́ве ху́ты, ху́ты:
 Түйта́мрищи́т у́нла́нтёгы́т,
 Ле́ңы́нрищи́т порга́нтёгы́т...
 Ху́рум хóтпа о́лысри́щүв:
 На́ң ос ам ос Ха́нсы́рищум.
 Ха́нсы карсы́т о́лысри́щум...
 Во́ркве хосы́т щаню́м э́рге
 Во́т хольт о́выс, о́выс, о́выс.
 Вос кос э́рың сы́ме ща́ргыс, —
 Ма́навн ре́гың, ре́гың о́лыс.
 Ма́ныщи сы́мум щарма́т ойна́с
 Ща́нюмн ню́нсыс, ю́вле э́ргыс:
 Та́ яны́т мүйлу́пса ху́нь о́лы —
 Ху́нь э́рыг ка́сыл сы́мын то́лы!

На́ң — ам сы́мум,
 Ам са́магум,
 Ща́ргын э́ргум,
 На́ң — ам ща́нюм.

Хо́тьют ма́ньга́гыл ва́щинта́лыс
 Лю́ныщи́ң саври́щ, нуса о́лту́л —
 Та́ хум сы́мыл мүйлу́пта́вес,
 Щарма́т мүйлу́пта́вес ё́вты́л.
 Ма́на я́ныт са́ве о́лыс —
 Аквта́ я́ныт со́тэ ё́хты;



Акв щёс вóт ке а́яла́лыс, —
 Э́лалё ё́му́нкв па́ты сохты́л!..
 Сы́мны́щ ми́р ё́т олу́нкв
 А́нум ха́нищтасы́н,
 Хо́са ле́ххяс кою́нкв
 А́нумн ла́выгласы́н.
 А́нь ам сы́мумт ла́щла́кв
 Э́ргы́т не́витё́гум.
 То́ва э́рыгсо́вы́тт
 Э́ры́ң мо́виньте́гум.
 То́ва э́рыг то́влы́тт
 Э́ры́ң сы́мум щисги.
 Туп на́ң сунсэ́н, сунсэ́н:
 Ту́лыг сы́м ат ё́мтыс!
 Туп на́ң ху́нтлэ́н, ху́нтлэ́н:
 Суи́ң э́рыг ю́нтыс!

Ху́нтлэ́н: мото́р ха́п хольт
 Э́ргум уи́ Та́гт во́льт.
 То́румт хо́тал ла́рги,
 Туп сы́мум са́ка ща́рги:
 Но́тын ва́ти о́лыс
 Щарма́т лүи́ тү́я.
 То́хтур ла́выс: «Хо́лас».
 «То́ртэ́н мо́лях ко́лас» —
 Аста́л ша́ман ла́выс,
 Ла́выс, са́лая́лыс...
 Щаньке́м, но́тын со́ль ма́н ва́ти?
 А́ти, а́ти! Ва́ти а́ти!
 Ня́влак во́тын во́щгыгла́вем —
 А́нум то́нт на́ң а́ниглы́лың;
 Ре́гың ви́тын сы́ныгта́вем —
 А́нум то́нт на́ң сы́ныгты́лың.
 Ка́сың пу́мта́рт лы́лың не́всы,
 Щань хольт ви́ты́нн ка́тын ню́нсы,
 Лы́лың ви́т самы́л сунсэ́гың,
 Ми́снэ ху́рил на́ң сусэ́гың
 Виткве о́сыт,
 Номту́м хосы́т.
 О́лэ́н,
 сусэ́н,
 ё́мен, йи́снэ!
 Лы́лтэ́н,
 лы́лтэ́н,
 э́рген, Ми́снэ!

МҮЙЛЫН ХӨТАЛЫТ

Ялпың хөталт товлыңхәпыт яласасыт



Лүпта этпос китхуйпловит щислат — Россия янытлан хөталыг Ұлы. Ты ялпың хөтал коньпал тыт Ханты-Мансийск Ұс 435 тәлә янытлавес. Ос Ұст Ұлнә мәхум мәгыс сыресыр кәсыт вәрыглавёсыт. Аквхуйпловит щислат мәхум Ұскант мүйлысыт ос мөтыт хөталәт Иртыш я нәлми вәтат ёмыгтым Ұшлахтасыт.

Тот губернатор Наталья Комарова ос Ұс кұшай хум Максим Ряшин мүйлын мәхум ёт пащалахтасыг, ёхтум мир янытласанён ос нилахуйплов тәланыл төвлум агиришит, пыгришит паспортыл майвёсыт. Тувыл сыресыр касылыт вәруңкве патвёсыт. Хөтал палыт ныврамыт савсыр щирыл кассыт, яныг хөт-

пат мәгыс нәйпос ищхипың утыт Ұвылтыт потыртавес. Акв мәт нётнә эрыгсовыт хунтлуңкве сав элумхолас атхатасыт, тот Канада мәныл Ұлнә соссан хум такви хорамың маснұтыл масхатым ёнгыс.

Мәхум Иртыш я хосыт минам савсыр метеорыт, нәиңхәпыт суссыт. Ты вәрмалъ «Северречфлот» тәң щёпитәлсыт. Тувыл

хотыл хөт товлыңхәп нәглапәлсыт. Тәң тыглетувле яласасыт, руш щирыл ләваве «пилотажный трюкыт» вәрсыт. Тыи, насати, нә хөтпат тох хәсәгыт, тәң Сургут Ұст Ұлнә «Барсы» нампә колт рүпитәгыт.

Этипәлаг мәхум мәгыс «Штурм-2017» намаим хөнтлын вәрмалит щёпитәлвёсыт. Тыи 1941 тәлт лүпта этпос вәт нұпыл китыт хөталт әлпыл немщыт хумус мән границавн ёхтыгпасыт ос хөнтлуңкве патсыт, тыи пуссын суссылтавёс. Тувле нас сунсым пилыщмаңыг Ұлыс, тот танк ос пулемётыт

пәтлұптасыт. Военный маснұтыл масхатым хөтпат писалил пәтлұптасыт, гранатат пәхвтысыт, мувлахи та посым. Тувыл нөңхәль суссұв, хумус мән товлыңхәпұв немецкий товлыңхәп нәвлалас ос нөх-патыс.

Россия ос Ұсув янытлан хөтал кастыл «Югра лылыёп» соссан мәхум общественный организацият рүпитан нә Ирина Самсонова хантыт ос мәнышит акван-атыгләлсанә. Тот сав мир хәлт мән мәнки нётнә маснұтанувтыл масхатым ёмыгтасұв.

Тамара МЕРОВА



Лүйма сәрипос

(Северная зоря)
№12 (1150), 22.06.2017

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Подписано в печать:
по графику 22.06.2017 г.
в 9.00.; фактически
22.06.2017 г. в 9.00.
Индексы **04399, 54399**
Тираж **1750 экз.**

Заказ **371**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.